

Poco di e Historia y Origen di Aruba su Carnaval y evolucion



ORANJESTAD- Ayera **BON DIA ARUBA** a trece un seccion caminda ta recorda nos paradan di antes, gruponan cu awe ya no ta participa mas y tambe nos reinanan.

STEELBAND

Full na comienso di Aruba su Carnaval, e participantenan tabata baila riba ritmo di steelband. Steelband a wordo introduci door di e inmigrantenan di Trinidad, cu a cuminsa cu esaki door di diferente factor: primeramente door cu nan tabata haya falta di nan mesun cultura y tambe pa motibo cu pa nan Aruba no tabata tin nada pa entreteñe nan. E prome persona pa introduci steelband na Aruba tabata Sr. Leonard Turner kende tabata un trahado di Lago Oil & Refinery. El a busca un grupo di mucha homber jong y nan a cuminsa experimenta cu musica. Esaki a resulta den e prome steelband di Aruba, yama Shoo- Shoo baby y Aruba All Star Boys.

Nan a cuminsa traha nan propio nan for di barinan colecta for di Lago. E bari- nan a wordo forma door di bati e fondo cu un martiu te ora cu nan a haya e forma y e tono. Poco poco nan a cuminsa experimenta cu mas y mas tononan, manera samba, rumba y otro musica popular di e temponan ey. Asina nan a cuminsa haya reconocimiento y nan popularidad a sigui crece y asina mas y mas musico a cuminsa join. Tin steelband a yega di surpasa e cantidad di 40 musico.

E prome competencia di steelband cu a yega di wordo organisa tabata na 1964. Un total di ocho steelband a competi den un competencia legendario. Merry- makers, the Devils, the Curacao Heroes, the Long Gun Boys, the Paradera Steelband, The Silver Stars, The All Stars y



Aruba Invaders. Tur tabata consisti di gruponan cu talento cu a produci e zonido di mas fantastico cu hopi a yega di tende. Na final tabata Aruba Invaders cu a bay cu e titulo cu e variante di temanan manera exodo y asina tambe ta bira e prome ganadonan di e competencia di steelband. Den añanan 60 y 70 di siglo pasa, steelband tabata manda den e paradan di carnaval. Nan a bira asina popular cu un total di 18 steelband a participa den e competencia di 1978. Lamentablemente, e cantidad di tocadonan di steelband a baha durante añanan 90. Esaki ta door di e falta di entusiasmo, aprecio y apoyo. Awendia, steelband casi ya ta un arte perdi.

GRUPONAN DI CARNAVAL

Antes tabata tin hopi di e gruponan cu tabata participa activamente den paradan di carnaval. Ken no ta corda e grupo di Sylvia Lourens, grupo di Sidonia, Club Caribe, Aruba Tivoli Club como tambe e grupo di carnaval di Savaneta. Mescos tambe tabata tin e gruponan di Shell, Texaco, Valero, Coastal y esun cu niun no por lubida ta e gruponan di Esso Club. Gruponan cu tur aña tabata tin nan participantenan fiel. Si antes e gruponan di



Carnaval no tabata conoce mucho luho of casi no tabata luhoso, pero e fantasia tabata resalta. For di un tema masha simpel, e diseñador tabata lo maximo di dje y riba caminda e fantasia tabata resalta. E gruponan no a sigui pa varios motibo: e lidernan di grupo a bira grandi y/o a fayece y e generacion siguiente no tabata interesa pa sigui cu esaki, tambe financiero nan no tabata por a sigui cu e grupo. Den caso di Shell, Texaco, Coastal y Esso Club. Tur esakinan a caba despues cu e refinaria Lago Oil & Company a cera su portanan na 1985 y asina no tabata tin sosten di e refinaria mas.



Tur esakinan tabata gruponan cu a yuda engrandec nos Carnaval te cu e aña aki Aruba ta celebrando su di 60 aña di Carnaval.

Reinanan di Carnaval

Na comienso di Carnaval, hopi tabata e mucha muhenan cu tabata bay competi pa reina. Den e temponan aya, e reina nan tabata representa un club social, un marca di sigaria, un marca di cerbes y tambe distrito tabata hopi activo. No tabata tin luho, y tur e candidatanan tabata bin bisti den un shimis blanco y asina tabata baila riba stage. Tabata tin añanan cu tabata haya casi 20 candidata riba escenario. Esaki ta conta pa tur tres categoria: infantil, hubenil y Reina di



Carnaval. Pero cu evolucion di e Carnaval e luho tambe e haci su entrada den eleccionnan di Reina, pa cual hopi no tabata por a carga e gastonan financiero cu baymento pa reina tabata trece cun'e. Awendia mayoria eleccion no ta yega ni 10 candidata riba escenario. □